

NYUMBA YA HAKI YA ULIMWENGU

RIDVÀN 2006

Kwa Wabahà'i wa Ulimwengu,

Marafiki Wapendwa sana,

Ridvàn 2006 ni wakati ambao umejaa ari ya ushindi na matarajio. Wafuasi wa Baha'u'llàh kila mahali wanaweza kujivunia kwa haki katika ukubwa wa mafanikio yao wakati wa Mpango wa Miaka Mitano ambao hivi sasa unakaribia mwisho. Na kuelekea siku zijazo wanaweza kuangalia kwa matumaini ambayo hujaliwa tu kwa wale ambao azma yao imekomazwa kupitia uzoefu. Ulimwengu mzima wa Kibahá'í umechochewa katika kufikiria upeo wa shughuli ya miaka mitano ambayo ipo mbele, kina cha kujiweka wakfu ambacho kitahitajika, na matokeo yaliyokusudiwa kufanikisha. Sala zetu zinaungana na zenu kadiri mnavyomgeukia Baha'u'llàh kwa shukrani kwa ajili ya upendeleo wa kushuhudia ukunjukaji wa kusudi Lake kwa ajili ya jamii ya binadamu.

Katika ujumbe wetu wa 27 Desemba, 2005 kwa Washauri waliokusanyika katika Nchi Takatifu, uliotumwa siku hiyo hiyo kwa Mabaraza yote ya Kiroho ya Kitaifa, tulieleza kinaganaga sura za Mpango wa Miaka Mitano ambao utatandaa toka 2006 hadi 2011. Marafiki na asasi zao walihimizwa kujifunza ujumbe huo kikamilifu, na bila shaka maudhui yake yanafahamika nanyi vyema. Sasa tunatoa wito kwa kila mmoja wenu kuelekeza nguvu zake kwenye kuhakikisha kwamba katika muda wa miaka mitano lengo la uanzishaji mipango ya ukuaji shadidi katika klasta zisizopungua 1,500 ulimwengu mzima linafanikiwa kutimizwa. Kwamba katika miezi iliyofuatia kuondoka kwa Washauri kutoka Makao Makuu maandalizi ya msingi kwa ajili ya uanzishaji Mpango yalifanywa kwa haraka na kwa utaratibu katika nchi hadi nchi ni dalili ya shauku ambayo kwayo jumuiya ya Kibahá'í inajitwalia changamoto iliyowasilishwa kwao. Wakati hakuna haja kwetu kufafanua zaidi juu ya mahitaji ya Mpango huo hapa, tunajisikia kusukumwa kuwapa kwa ajili ya tafakari yenu maoni machache katika muktadha wa kiulimwengu ambao jitihada zenu za mtu binafsi na za pamoja zitafuatiliwa.

Zaidi ya miaka sabini iliyopita Shoghi Effendi aliandika barua zake kuhusu Utaratibu wa Ulimwengu ambamo alitoa uchanganuzi elekevu wa nguvu zifanyazo kazi ulimwenguni. Kwa ufasaha ambao ulikuwa wake yeye pekee, alielezea michakato mikuu miwili ambayo imeanzishwa na Ufunuo wa Baha'u'llàh, mmoja wa uharibifu na mwingine wa uunganishaji, yote inasukuma mbele jamii ya binadamu kuelekea Utaratibu wa Ulimwengu alioufikiria Yeye. Tulitahadharishwa na Mlinzi; "tusipotoshwe na mwendo wa pole pole uumizao unaoainisha ukunjukaji wa ustaarabu" unaoanzishwa kwa sulubu au "kudanyanywa na madhihirisho ya kupita ya kurudisha usitawi ambao wakati mwingine huonekana waweza kuondoa athari haribifu ya maradhi sugu yanayoziumiza asasi za zama zinazooza". Hakuna uchambuzi wa mwenendo wa

matukio katika miongo ya hivi karibuni unaoweza kushindwa kukiri mwendo uongezekao wa michakato aliyoichanganua wakati huo kwa usahihi kama huo.

Mtu anahitaji tu kufikiria juu ya migogoro inayokita mizizi ya kimaadili inayomeza jamii ya binadamu, kutambua vyema kiasi ambacho nguvu za uharibifu zilivyoraru mfumo wa jamii. Je, si kwamba shuhuda za ubinafsi, za shaka, za hofu na za udanganyifu, ambazo Mlinzi alizona kwa ubayana zimeenea mahali pote hata kuonekana kwa wepesi kwa mchunguzi wa kawaida? Je, si kwamba tishio la ugaidi ambalo alilizungumzia linaonekana kubwa mno la kutisha kwenye mandhari ya kimataifa hata kuzishughulisha akili za vijana na wazee kadhalika katika kila pembe ya dunia? Je, si kweli kwamba kiu isiyokatwa kwa, na utafutaji wa mambo ya upuuji ya kidunia, utajiri na anasa imeimarisha mno uwezo wake na nguvu hata kuwa na mamlaka juu ya njema za kibinadamu kama vile furaha, uaminifu na upendo? Je, si kwamba udhoofishaji wa mshikamano wa familia na mwelekeo usiowajibika kwa ndoa umefikia ule ulinganio kiasi cha hata kuhatarisha kuwepo kwa sehemu ya msingi ya jamii? “Upotoshaji wa asili ya binadamu, kumomonyoka kwa mwenendo wa mwanadamu, uozo na uvunjikaji wa asasi za binadamu,” ambavyo kwavyo Shoghi Effendi alionya kabla, kwa huzuni vinajifunua vyenyewe “katika namna zao mbaya kabisa na zinazochukiza mno.”

Mlinzi anatupia sehemu kubwa kabisa ya lawama kwa mmomonyoko wa maadili juu ya uangukaji wa dini kama nguvu ya kijamii. “Kama taa ya dini ikitiwa giza,” yeye huelekeza umakinifu wetu kwenye maneno ya Baha’u’llah, “machafuko na ghasia vitafula, na miangaza ya usawa, ya haki, ya utulivu na amani itakoma kung’aa. Miongo iliyofuatia uandikaji wa barua zake imeona siyo tu uharibikaji uendeleo katika uwezo wa dini kutumia ushawishi wa kimaadili, lakini pia usaliti wa watu wengi kupitia mwenendo usiostahili wa asasi za kidini. Majaribio ya kuihuisha kumesababisha tu ushabiki ambao, ikiwa utapuuzwa, ungeweza kuangamiza msingi wa uhusiano wa kistaarabu miongoni mwa watu. Mateso ya Wabahá’í huko Iràn, yaliyozidishwa hivi karibuni, pekee ni ushuhuda maridhawa wa dhamira ya nguvu za giza kuzima mwale wa Imani popote pale uwakapo kwa wangavu. Ingawa tuna imani juu ya hatma ya ushindi wa Hoja, hatuthubutu kusahau onyo la Mlinzi kwamba Imani italazimika kupambana na maadui wenye nguvu zaidi na wenye hila zaidi kuliko wale walioitesa wakati uliopita.

Hakuna haja ya kuelezea kwa mapana juu ya udhaifu wa ustadi katika utawala, ni wazo lingine lililoelezwa na Mlinzi kwa ustadi mwingi katika barua zake za Utaratibu wa Ulimwengu. Kupanuka kwa mgawanyiko wa kiuchumi kati ya matajiri na masikini, kushikilia uhasama wa zama kati ya mataifa, idadi iongezekayo ya watu waliokosa makazi, ongezeko lisilo la kawaida la uhalifu wa kupangwa na vurugu, hisia ya hatari ieneayo pote, kuharibika kwa huduma za kimsingi katika maeneo mengi sana, utumiaji usio wa busara wa maliasili—hizi ni chache tu kati ya ishara za kushindwa kwa viongozi wa dunia kubuni mifumo madhubuti kupunguza magonjwa ya jamii ya binadamu. Hii siyo kusema kwamba kwa kweli, jitihada za kweli hazikufanywa, hazikuongezeka muongo hadi muongo. Hata hivyo jitihada hizi, haidhuru ziwe za kiustadi namna gani, hazitoshi kabisa kuondoa “chanzo cha uovu ambao kwa ufidhuli mno umevuruga utengamano wa jamii ya wakati huu.” Mlinzi alidai, “hata siyo” “kitendo hasa cha

kubuni chombo kihitajikacho kwa ajili ya uunganishaji wa kisiasa na kiuchumi ulimwenguni.....chenyewe kingetoa kiuasumu dhidi ya sumu ambayo kwa uthabiti inadhoofisha nguvu za watu na mataifa yenye utaratibu.” “Nini zaidi,” yeye kwa kujiamini alithibitisha, bali kuikubali bila kusita Programu Takatifu” iliyotamkwa wazi na Baha’u’llah, “ikijumuisha katika mambo yake muhimu mpango mtakatifu ulioteuliwa na Mungu kwa ajili ya uunganishaji wa binadamu katika wakati huu, ukiunganishwa na imani isiyoshindika katika kuleta matokeo yasiyoshindwa ya kila moja na yote ya masharti yake, hatimaye ukiwa na uwezo wa kuhimili nguvu za uchangukaji wa ndani ambao, ukipuuzwa, sharti lazima uendelee kuvimaliza viungo muhimu vya jamii inayokatishwa tamaa.”

Ni wenye kupenyeza, kwa hakika, ufafanuzi wa Shoghi Effendi wa mchakato wa uchangukaji uongezekao ulimwenguni. Vivyo hivyo cha kuvutia ni usahihi ambao kwao yeye amechanganua nguvu zihusianazo na mchakato wa uunganishaji. Yeye alizungumzia juu ya “kusambaa pole pole kwa moyo wa mshikamano wa kiulimwengu ambao unajiinua wenyewe kutoka katika ya machafuko ya jamii isiyo na utaratibu” kama udhihirisho usio dhahiri wa dhana ya kanuni ya Baha’u’llah ya umoja wa jamii ya binadamu. Moyo huu wa mshikamano umeendelea kuenea zaidi kwa miongo, na leo matokeo yake yanaonekana dhahiri katika safu za maendeleo, kutoka ukataaji wa chuki za kimbari zenye kina kilichotopea hadi ufahamu unaopambazuka wa uraia wa ulimwengu, kutoka ufahamu wa mazingira uliozidishwa hadi jitihada za kiushirikiano katika uendelezaji wa afya ya jamii, kutoka uhusikaji na haki za binadamu hadi ufuatiliaji wenye utaratibu wa elimu kwa wote, kutoka uanzishaji wa shughuli za ushirikiano wa kidini hadi uchanuaji wa mamia ya maelfu ya mashirika ya mahali, kitaifa na kimataifa yanayojihusisha na aina fulani ya shughuli za kijamii.

Bado kwa wafuasi wa Baha’u’llah maendeleo ya maana sana katika mchakato wa uunganishaji ni yale ambayo huhusiana moja kwa moja na Imani, mengi ya hayo yalilelewa na Mlinzi mwenyewe na ambayo yameendelea mno tangu mwanzo wao wa kawaida. Kutoka kiini kidogo cha waumini ambacho alikipa mipango yake ya kwanza ya ufundishaji kimekuwa jamii ya kimataifa kikiwa katika maelfu ya maeneo, kila kimoja kikifuata ruwaza iliyoanzishwa vyema ya shughuli ambayo hujumuisha kanuni za Imani na matamania. Juu ya msingi wa Utaratibu wa Kiutawala ambao kwa jitihada kubwa mno aliuweka wakati wa miongo ya mwanzo ya utumishi wake umeinuliwa mtandao mkubwa, uliofumwa kwa ukaribu wa Mabaraza ya Kiroho ya Kitaifa na ya Mahali yakisimamia kwa juhudi na uangalifu mambo ya Hoja katika zaidi ya nchi mia moja themanini. Kutoka vikosi vya kwanza vya Washauri wasaidizi kwa ajili ya Ulinzi na Uenezaji wa Imani vilivyoanzishwa naye kimeinuka kikosi cha askari cha takribani wafanyakazi hodari elfu moja wakihudumu ugani chini ya uongozi wa Washauri themanini na moja wakiongozwa kwa ustadi na Kituo cha Ufundishaji cha Kimataifa. Ukuaji wa hatua kwa hatua wa Makao Makuu ya Ulimwengu ya Kiutawala ya Imani, ndani ya mipaka ya Makao yake Makuu ya Kiroho, mchakato ambao Mlinzi aliutolea wakfu kwa nguvu nyingi sana, umevuka kizingiti cha muhimu sana kwa Nyumba ya Haki ya Ulimwengu kukalia Kiti chake kwenye Mlima Carmel na ukamilishaji uliofuata wa Jengo la Kituo cha Ufundishaji cha Kimatifa na Kituo kwa ajili ya Ujifunzaji wa Maandiko. Asasi ya Huq’uqu’llah imeendelea kwa uthabiti chini ya usimamizi wa Mkono wa Hoja

Dkt. ‘Ali-Muhammad Varqa, Mdamini aliyeteuliwa na Shoghi Effendi miaka hamsini iliyopita, ikifikia kilele katika uanzishwaji wa bodi ya kimataifa mnamo 2005 iliyobuniwa kuendeleza matumizi mapana endelevu ya sheria hii kuu, chanzo cha baraka zisizokadirika kwa jamii nzima ya binadamu. Jitihada za Mlinzi kuinua wasifu wa Imani katika duru za kimataifa zimejitokezea kwenye mfumo mpana wa mambo ya nje, wenye uwezo wa kutetea maslahi ya Imani na kutangaza ujumbe wake wa ulimwengu. Heshima ambayo Imani huifurahia katika jukwaa la kimataifa, wakati wowote wawakilishi wake wazungumzapo, ni mafanikio yastahiliyo kuthaminiwa sana. Uaminifu na moyo wa ibada ambao wana-jumuiya waakisio anuwai ya jamii nzima ya binadamu hudhihirishwa kwa Agano la Baha’u’llah hufanya hifadhi madhubuti ambayo mfano wake hakuna kikundi chohote chenye utaratibu kinaweza kudai.

Mlinzi aliona mbele kwamba, katika vipindi vifuatavyo vya Zama za Ujenzi, Nyumba ya Haki ya Ulimwengu ingeanzisha safu za shughuli zinazoenea ulimwengu mzima ambazo “zingekuwa ishara ya umoja na zingeratibu na kuunganisha shughuli” za Mabaraza ya Kiroho ya Kitaifa. Katika muda wa vipindi vitatu vinavyofuatana sasa, jumuiya ya Kibahai imejishughulisha kwa uangalifu ndani ya muundo wa Mipango ya kiulimwengu itolewayo na Nyumba ya Haki na imefanikiwa katika kuanzisha mtindo wa maisha ya Kibahai ambao huendeleza ukuaji wa kiroho wa mtu binafsi na huelekeza nguvu za pamoja za washiriki wake kwenye uhuishaji wa jamii kiroho. Imejipatia uwezo kuzifikishia ujumbe idadi kubwa za roho pokavu, kuzithibitisha, na kuziongezea zaidi ufahamu wao wa mambo muhimu ya Imani waliyoikubali. Imejifunza kutafsiri kanuni ya ushauriano iliyotamkwa na Mwasisi wake kuwa ni chombo kinachofaa kwa ajili ya ufanyaji maamuzi ya pamoja na kuwaelimisha washiriki wake kuhusu matumizi yake. Imebuni mipango kwa ajili ya elimu ya kiroho na ya kimaadili ya washiriki wake vijana na imeipanua si tu kwa watoto na vijana chipukizi wake yenyewe, bali pia kwa wale wa jamii pana zaidi. Ikiwa na bwawa la vipaji kwenye himaya yake, imejitengenezea mkusanyiko mkubwa wa machapisho ambayo hujumuisha matoleo katika korija za lugha ambazo hushughulikia mahitaji yake yenyewe na ragha ya umma mzima. Imekuwa ikijihusisha kwa kiasi kikubwa katika mambo ya jamii kwa jumla, ikianzisha miradi mingi ya maendeleo ya kijamii na kiuchumi. Hususan tangu kuanza kwa kipindi cha tano mnamo 2001, imepiga hatua kubwa muhimu katika kuzidisha rasilimali watu kupitia program ya mafunzo ambayo huufikia umma wa jumuiya na imegundua mbinu na vyombo kwa ajili ya uanzishaji wa muundo wa ukuaji endelevu.

Ni katika muktadha wa mwingiliano wa nguvu iliyoelezewa hapa kwamba kipengele cha uendelezaji wa mchakato wa uingiaji kwa makundi lazima kitazamwe. Mpango wa Miaka Mitano unaoanza sasa unahitaji kwamba mkazie nguvu zenu kwenye mchakato huu na kuhakikisha kwamba ile mijongeo miwili ishamirishanayo katikati yake inachapuzwa. Hii inapaswa iwe shughuli yenu kuu. Kadiri juhudi zenu zizaavyo matunda na nguvu za ukuaji kufikia kiwango kipya cha utata, kutakuwepo na changamoto na fursa kwa Makao Makuu ya Ulimwengu yenyewe kushughulikia katika miaka mitano ijayo katika nyanja kama vile mambo ya nje, maendeleo ya kijamii na kiuchumi, utawala, na matumizi ya sheria za Kibahai. Ukuaji wa jumuiya tayari umelazimisha kwamba maandalizi mapya sharti yafanywe ili kuzidisha mara mbili idadi ya mahujaji hadi kufikia mia nne kwa kila kikundi kuanzia Oktoba 2007. Kuna miradi

mingine kadhaa ambayo pia itapaswa ifuatiliwe. Miongoni mwa hii ni uendelezaji zaidi wa bustani zinazolizunguka Kaburi Takatifu la Baha'u'llàh, hali kadhalika Bustani ya Ridvàn na Mazra'ih; utengenezaji upya wa Jengo la Kumbukumbu la Kimataifa; ukarabati wa kimiundo kwenye Kaburi Takatifu la Bàb, ambapo kiwango kamili cha ukubwa wa ukarabati huo bado hakijawa dhahiri; na ujenzi wa Nyumba ya Ibada huko Chile kama ilivyoona na Mlinzi, ikiwa ni ya mwisho kati ya Mashriqu'l-Adhkâr za mabara. Kadiri jitihada hizi ziendeleavyo, tutatoa wito kwenu wakati hadi wakati kwa ajili ya msaada, wa vyote viwili kwa namna ya msaada wa kifedha na vipaji maalum, ikikumbukwa kwamba raslimali za Imani sharti, kwa kiasi kikubwa kabisa iwezekanavyo, zielekezwe kwenye mahitaji ya Mpango.

Marafiki wapendwa: Kwamba nguvu za uchangukaji zinaongezeka katika safu na uwezo haiwezi kupuuzwa. Vivyo hivyo ni dhahiri kwamba jumuiya ya Jina Kuu Kabisa imekuwa ikiongozwa na Mkono wa Mjalia kutoka nguvu hadi nguvu na sasa lazima iongezeke katika ukubwa na kuongeza raslimali zake. Uelekeo uliowekwa na Mpango wa Miaka Mitano uko wazi. Je, inawezekanaje kwa wale miongoni mwetu tukifahamu hali mbaya ya jamii ya binadamu, na tukitambua mwelekeo ambao kwamo historia inajikunjua, tusiinuke kwa uwezo wetu wote na kujiweka wakfu sisi wenyewe kwa shabaha yake? Je, maneno ya Mlinzi kwamba “jukwaa limeshawekwa” hayawi kweli kwetu leo kama yalivyokuwa alipoyaandika wakati wa Mpango wa kwanza wa Miaka Saba? Acha maneno yake yavume masikioni mwenu: “Hakuna wakati wa kupoteza.” “Hakuna nafasi iliyoachwa ya kuyumba.” “Nafasi kama hii haifidiiki.” “Kujaribu, kustahimili, ni kuhakikisha ushindi wa mwisho na mkamilifu.” Muwe na hakika juu ya sala zetu endelevu kwenye Kizingiti Kitakatifu kwa ajili ya mwongozo na ulinzi wenu.

Nyumba ya Haki ya Ulimwengu